



UNIVERSITÄTS-
BIBLIOTHEK
PADERBORN

Jus Canonicum Ad Libros V. Decretalium Gregorii IX.

Huth, Adam

Augustæ Vindelicorum, 1732

2. De Constitutionibus

[urn:nbn:de:hbz:466:1-63433](#)

c. 2. de reform. §. idemque & Constit. Gregor. XIV. *Onus Apostolicae*. edit 13. Martii. 1591. 3. Prælati Monasteriorum, Conventuum, domorum, aliorumque locorum Regularium quorumcunque, etiam Ordinum militarium, uti Trid. extendit pius IV. Constit. *Injunctum nobis*. edit. idib. Nov. 1564. 4. Magistri, Regentes, & alii cuiuscunq[ue] artis liberalis Professores, sive Clerici, sive Laici. Constit. Pii V. quæ incipit *In Sacrosancta*. quâ latæ sententiæ, sed non reservatæ Excommunicationis & privationis omnium dignitatum, beneficiorum, & officiorum, & ad eadem, aliisque beneficia imposterum obtainenda inhabilitatis pœna decernitur in eos, qui ad Cathedram, Gradusque literarios promoverint aliquem sine prævia Professione: & Gradus ac promotio irritatur.

TITULUS II.

De Constitutionibus.

Q 1. Qualiter *Constitutio definienda*? **R.** Accepta generaliter & pro lege humana scripta, uti in hac rubrica sumitur, est *Ordinatio rationis ad bonum commune ab eo, qui curam habet Communitatis, promulgata*. D. Thom. I. 2. q. 90. **a.** 4. includit actum intellectus & voluntatis, & imperium, sive intimationem factam signo aliquo externo. Alii definunt sic: *Lex est preceptum commune, justum, stabile, à Republ. vel ha-
Liber I. B mine*

mine Communitatis curam gerente latum & sufficienter promulgatum.

Q. 2: Quænam sit forma legis? R. 1. Sunt verba vel alia signa externa, quibus Legislatoris legem condentis voluntas manifestatur Communitati; qualia sunt, *præcipimus, mandamus, jubemus, interdicimus, teneantur &c.* R. 2. Ad rationem & formam legis scriptura uon requiritur; quia hæc ex natura legis non probatur esse necessaria; neque etiam stabilitas legis essentialis scripturam includit. R. 3. Sententia quoque à Principe lata non habet viam legis. *L. 2. C. de LL. & c. 25. de sent. & re judic.* Ratio, quia sententia non respicit bonum commune, sed speciale, non casum futurum, sed præteritum &c. Aliud foret, si mentem suam Legislator sufficienter declararet, velle se sententiam quandam legis instar observari, mandando v. g. tales sententiam inseri Corpori Juris &c.

Q. 3. An ad rationem Legis spectet promulgatio & qualis requiratur? R. ad 1. aff. ita ut vera lex non sit, nec obliget ante promulgationem. *L. 9. C. de LL.* Ratio, quia Lex est regula non unius personæ, sed totius Communitatis, ergo debet esse ritè proposita & sufficienter promulgata.

R. ad 2dum. 1. Promulgatio debet esse publica, id est, in publico facta, nec sufficit, factam esse in consistorio Principis. *Can. 3. §. Leges. dist. 4. & ratione antè data.*

R. ad 2dum 2. Lex Civilis pro toto Imperio lata,

Iata, in singulis Imperii provinciis *jure positivo* debet promulgari, & duo insuper à facta promulgatione menses concedi, usquedum subditi obligentur. *Nov. 66. rubr.*

R. ad 2dum. 3. Ad Legem Pontificiam, ut astringat omnes Christi fideles saltem in actu primo, probabilius sufficit, promulgationem debitè esse factam Romæ, nisi lex ipsa vel Pontifex aliud declareret. Ratio, quia plus nec ex natura Legis, nec ex jure positivo requiritur; & ita praxis Romana habet.

Q. 4. An sicut promulgatio Legis, sic etiam acceptatio populi sit necessaria ad valorem Legis?
R. Negativè extra statum Democraticum. Ratio. Vel enim 1. acceptatio sumitur pro consensu populi, quasi verò hic ad substantiam legis sit necessarius; & falsum est, cum quoad Leges Civiles ferendas populus absque ulla reservatione supremam potestatem & legislativam in Principem transtulerit. L. 1. ff. de Constit. Princ. quoad Leges Ecclesiasticas verò Pontifex independenter à populo immediatè à Christo acceperit potestatem. Joan. 21. & Matth. 16. Vel 2. acceptatio sumitur pro voluntate recipiendi in se obligationem legis jam conditæ, acsi hæc voluntas per modum conditionis, ut lex obliget, sit necessaria; & incurritur propositio damnata ab Alex. VII. an. 1665. 24. Sept. Vel 3. sumitur acceptatio populi pro actuali legis observantia, ut absque hac neque stabilis in effectu sit lex, neque firma; & concedimus talem acceptationem requiri juxta

L. 32. ff. de LL. & can. 3. dist. 4. Sed talis acceptatio jam supponit legem in esse suo constitutam,

Q. 5. Quænam sit materia Legis? R. 1. Materia sive objectum, circa quod lex versatur, sunt actiones & omissiones humanæ, quæ præcipi, prohiberi, permitti, puniri possunt. Arg. L. 7. ff. de LL. Hinc 1. Legis præceptivæ materia non potest esse res physicè vel moraliter *impossibilis*; cum ad impossibile nemo obligetur: nec actus valde ardui virtutum. Can. 2. dist. 4. nec actus *per se* *inhonestus*; quia talis lex non esset rationabilis. 2. Nec Legis præceptivæ, prohibitiæ, vel punitivæ materia esse potest actus *præteritus*, quomodo enim istæ Leges ad actus præteritos se extendent? id tamen convenit Legi *irritanti* & *declaratoria*. c. cum tu. de usur. c. fin. de sponsal. 3. Legis prohibitiæ materia sunt non tantum mala in se, sed & actiones ex natura sua honestæ, in quantum bono publico vel certo fini disconvenientes sunt; sic die festo prohibetur labor servilis. 4. Lex *permisiva* non modò actiones ex se indifferentes indulget, sed & subinde *inhonestas*, non approbando sed tolerando. 5. Lex *punitiva* persequitur actiones Legum violativas.

R. 2. Materia Legis humanæ sunt regulariter actus *externi* & *occulti* tantum *per accidens*. Deinde actus merè interni & *per se* *occulti* sunt materia legis humanæ saltem *indirecte*, quia potest præcipere actum externum, v. g. auditionemafari, ad cuius positionem necessarii sunt actus interni.

terni. *Demum* actus merè interni possunt etiam esse materia directa Legis humanæ Ecclesiasticae. Ita Lacroix. *L. 1. n. 652.* Ratio, quia potestas pascendi fideles, item solvendi & ligandi à Christo data est generaliter sine restrictione ad actus externos, ergo & generaliter intelligi debet. 2. Ecclesia de facto varias Leges de actibus merè internis edidit: sic *Trid. sess. 13. in decreto de Ssma Euchar.* prohibet aliter credere; NB. de Eucharistia, quām præsenti decreto explicatum. Videantur damnatae ab Alexandro VII. & Inno. XI. 3. Unde habetur, quod potestas legislativa necessariò conjuncta sit cum coactiva? &c.

Q. 6. Quæ sit causa finalis Legis? R. Causa finalis seu finis legis est bonum commune Reip. *Can. 2. dist. 4. L. 1. ff. de LL.* Et hoc bonum commune necessariò omnis Lex respicere debet, & dum desinit esse utilis Communitati, & ipsa cessat.

Q. 7. Quænam sit causa efficiens Legum Ecclesiasticarum; sive, quinam possint Leges Ecclesiasticas condere? R. 1. Leges universales Ecclesiasticas solus potest ferre summus Pontifex, etiam sine consensu aut consilio Cardinalium, vel Concilii Generalis. Ratio, quia in D. Petro potestas à Christo data est Papæ in totam Ecclesiam, ex qua etiam inferiorum respectu sui potestatem legislativam limitare, suspendere vel omnino auferre potest.

R. 2. Leges Ecclesiasticas particulares varii pro suo territorio ferre possunt, v. g. Episcopi etiam

B 3 non

non consecrati pro tota diœcesi. c. 2. de *Constit.*
in 6. Cardinales respectu Ecclesiarum sui tituli.
c. 11. de *major.* & *obed.* Prælati Episcopo in-
feriores tam exempti habentes territorium, quam
Prælati Ordinum Regularium, utpote qui habent
respectu Religiosorum suorum jurisdictionem qua-
si Episcopalem, & potestatem gubernativam, Ab-
batissæ tamen hanc non habent.

R. 3. Varie item Communitates Ecclesiasticæ
leges condere possunt; v. g. Concilium Gene-
rale accedente Pontificis autoritate pro tota Ec-
clesia: Concilia Nationalia, Provincialia, Diœce-
sana: Capitulum *Cathedrale* Sede vacante c. 14.
de *major.* & *obed.* quod tamen nec juri Episco-
pali quæsito, nec competentibus Episcopo jure
speciali præjudicare potest. Similis potestas fe-
rendi Leges non competit Cardinalibus Sede Pa-
pali vacante. c. 3. de *elect.* in 6.

R. 4. Nec Imperator, nec aliis Princeps sæ-
cularis ferre potest leges concernentes Ecclesiam,
rem sacram & spiritualem, vel personas Ecclesia-
sticas, præsertim si Ecclesiis vel personis Ecclesia-
sticas sint onerosæ. Similes leges sunt imponen-
tes Ecclesiis & personis sacris vestigalia, gabellas,
collectas: excludentes à paterna successione in
Religionem ingressos: prohibentes, ne bona im-
mobilia vendantur, aut alio modo in Ecclesiis
alienentur. c. 7. 10. b. t. c. 49. de *sent. Excomm.*
Bulla Cœnæ casu 18. & ratio est defectus juris-
dictionis in Laicis respectu Clericorum, à qua jure
optimo exempti sunt Ecclesiastici juxta T.iid. *sess.*
25. c. 20. de *reform.*

Q. 8.

Q. 8. *Penes quem sit potestas condendi Leges Civiles?* **R.** 1. Pontifex pro subjectis jurisdictioni sue temporali Leges Civiles condere potest, ut alius Princeps secularis superiorem non recognoscens; ultra territorium potestas illa legislativa per se & directe se non extendit. Ratio; quia nec ex Scriptura, nec ex aliis historiis id potest probari. *Deinde* potestas legislativa respicit essentialiter subditos, in civilibus vero & temporibus fideles extra territorium Papæ existentes subditi ejus non sunt. *Demum* ex ipsa Pontificum confessione assertio patet. *can. 8. dist. 10. can. 6. dist. 96.*

R. 2. Imperator in regnis pleno jure sibi subjectis plenam habet potestatem condendi Leges Civiles, ut patet: in Imperio hodie cum consensu statuum. Ita habetur ex variis Imperii Recessibus & Imperatorum Capitulationibus.

R. 3. Principes & Status Imperii pro territoriis suis possunt ferre Leges particulares. *L. 9. ff. de J. & J.* etiam contrarias juri communi, idque vel ex concessione Imperatoris vel ex consuetudine: non possunt tamen Episcopi in suis diœcesibus ferre Leges Ecclesiasticas Juri Canonico communi contrarias ob ingens, quod intercurreret, animarum periculum in tali abrogatione Juris communis Ecclesiastici.

Q. 9. *Ad quæ se extendat potestas humanae Legislativa?* **R.** 1. Nullus Legislator humanus siue Ecclesiasticus, siue Civilis potest Leges con-

dere contra jus naturale vel divinum præceptivum. Ratio, quia sic inferior abrogaret vel relaxaret Legem Superioris, quod fieri nequit: dum itaque dispensatur v. g. in votis, non immutatur directè Lex divina, præcipiens, vota esse servanda; sed talis dispensatio vel sit potestate aliqua non merè humanâ; vel quia vota dependenter à voluntate humana obligant, hac per Superiores, quibus subjacet, immutatâ, per consequens & indirectè votum tollitur; vel denique quia vota aliter à DEO non acceptantur, quām prout potest ab Ecclesia sunt approbata.

R. 2. Jus naturale permisivum immutari potest à potestate Legislativa humana, v. g. illi addendo aliquid; uti enim ars naturam, ita Lex positiva perficit naturalem.

R. 3. Non potest princeps cum præjudicio & diminutione juris subditorum *absque justa causa* aliquid statuere. Ratio, quia Princeps constitutus est à DEO non ut pro libitu agat; sed ut justitiam colat. Vide *Ezech. c. 46. v. 18. &c.*
4. Reg. 10.

R. 4. Pontifex habet quidem facultatem liberam disponendi de beneficiis Ecclesiasticis. c. 2. *de præb. in 6.* Non tamen res & jura locis & personis Ecclesiasticis quæsita pro arbitrio potest auferre, quia non est absolutus horum Dominus, sed tantum administrator. Plura habet Leur. *in for. benef. p. 2. q. 512,*

Q. 10.

Q. 10. *An leges humanæ obligare possint & obligent in conscientiâ?* **R. I.** aff. Ratio, quia Legislator humanus fert Leges nomine & auctoritate DEI, cuius vices gerit; ipsum etiam lumen naturæ dictat esse obtemperandum justa præcipienti; insuper posse obligare in conscientia, necessarium omnino est ad rectam Reip. gubernationem. Textus ex Scriptura sunt *Rom. 13. Hebr. 13. 1. Petri 2.* Illud tamen observandum, quod Leges humanæ *in re levi* non possint sub gravi culpa ex intentione Legislatoris obligare; quia intentio hæc Legislatoris esset iniqua: possunt tamen Leges humanæ *in re gravi* obligare sub veniali ex voluntate Legislatoris; quia hoc nec ratione materiæ gravis, neque ex voluntate Legislatoris, neque ex parte jurisdictionis repugnat.

R. ad 2. Omnis lex humana propriè talis semper in conscientiâ obligat saltem ad aliquid. Ratio, quia obligatio est de essentia Legis, ita ut Lex pœnalis, Lex permissiva, Lex irritans, Lex fundata in præsumptione, si maneat vera Lex, in conscientia obliget.

Q. 11. *An & quando Lex pœnalis obliget in conscientia?* **R. I.** Datur Lex mere pœnalis quæ obliget ad pœnam tantum temporalem in conscientia, non ad ipsum actum vel omissionem actus; talis est, quæ vel facit mentionem solius pœnae, v. g. *qui exportaverit frumentum, 50. fl. multabitur*; vel quæ prohibet actum, simulque minatur pœnam sub disjunctione, dicendo v. g. *vel nemo exportet frumentum, aut qui exportaverit, 50. fl.*

B 5 mul-

mulctabitur. Ratio assertionis, quia in arbitrio Legislatoris est, vel ad actum & pœnam simul, vel ad pœnam tantum obligare, si ergo utitur verbis merè pœnalibus, recte censetur velle tantum ad pœnam obligare.

R. 2. Si Lex pœnalis sit *conjunctivè mixta*, prohibendo actum & simul minando pœnam, v. g. *nemo frumentum evehat.* & qui evexerit, s. o. fl. *mulctabitur*, ad ipsum actum & simul ad pœnam obligat, nisi aliunde constet de mente Legislatoris. Ratio, quia Legislator dum utitur verbis præceptivis vel prohibitoriis, censendus est, uti potest, obligare ad actum ejusve omissionem. Sequitur hinc, quod Leges tributorum & vectigalium *per se loquendo* in conscientia obligent; & probatur tum ex Scriptura *Luc. 20.* & *Rom. 13.* tum ex ratione, quia Lege naturæ tenentur subditi ad alimenta Principi subministranda, sed tributa ad sustentationem Principis pertinent, ergo.

Q. 12. *Quid de Lege irritante dicendum?* R. 1. Non eo ipso, quod Lex prohibeat actum, etiam irritat illum. c. 16. *de Regular.* c. un. *de vot. in 6.* Ratio, quia haec duo sunt valde distincta prohibere & irritare.

R. 2. Nec eo ipso, quod Lex irritet actum, etiam illum prohibet, ut quis in conscientia illum omittere teneatur: patet in testamento absque solennitatibus facto, quod ita faciens non peccat; subinde tamen peccari potest ponendo actum irritum non vi legis irritantis, sed aliunde: sic,

v. g.

v. g. emittens Professionem nullam non servatā formā peccat, obligatione orta ex Lege naturali, quā quis tenetur actus Religionis validē præstare.

R. 3. Si lex irritans sit pœnalis, id est, inducat nullitatem in pœnam delicti, actus tali Legi contrarius *regulariter* non est irritus ante sententiam Judicis. Ratio, quia pœna ordinariè non incurritur ante sententiam.

R. 4. Si irritatio non est pœnalis, incurritur ante sententiam Judicis saltem in foro externo, sive actus Legi irritanti non pœnali contrarius nullus est in foro externo, est communis DD.

R. 5. Actus à Lege humana irritatus simpliciter, non hoc ipso irritus est in foro conscientiæ, sed in hoc parit obligationem; v. g. testamentum solennitatibus constitutum in foro conscientiæ tenet, si constet certò de voluntate defundi, ut hæres ex tali testamento capere possit. Rationes multæ afferri possunt; una est hæc: Lex irritans actum ipso jure est correctoria juris & valdè odiosa, ergo si irritet actum simpliciter tantum, quin exprimat sati, quod etiam velit irritare in conscientiâ, id non est afferendum &c. Posse tamen etiam quoad forum internum irritari actum debitum solennitatibus constitutum, patet in Trid. annullante contractum matrimonii absque Parocho & testibus celebratum.

Q. 13. *An & qualiter Lex fundata in præsumptione obliget?* R. 1. Dum lex vel præceptum

ptum fertur ob præsumptionem aliquam facti particularis, si præsumptio falsa est, talis Lex seu præceptum non obligat. Ratio, quia cessat adæquatus finis legis & præcepti. Exempla habentur in c. 13. de restit. spoliat. &c. c. 44. de sent. Excomm..

R. 2. Dum Lex fundatur in præsumptione, fraudis, damnificationis, vel alterius culpæ in quolibet simili actu particulari intercedentis, si constat de falsitate præsumptionis, non obligat Lex in conscientia. Ratio, quia præsumptio cedit veritati. *L. si Imperatores 29. ff. de probat.* Sic jus præsumit, quemcunque post quinquennium Professionis, eam aliás invalidè emissam ratificasse, & hinc Trid. sess. 25. c. 9. de reform. non permittit à Religione recedere, & tamen hac lege non tenetur, qui certò scit, se nunquam habuisse animum, illam ratificandi. Similes casus plures affert Leur. ad hunc tit. Q. 96. num. 3.

R. 3. Dum Lex seu præceptum fundatur non in præsumptione facti alicuius, v. g. fraudis, negligentiæ, damnificationis intervenientis in particulari aliquo casu, vel etiam in quovis casu particulari, sed in universalis periculo multarum fraudum &c. plerumque secuturarum, nisi certa legis cautio adhibetur; talis, inquam, Lex non cessat obligare in utroque foro, licet hic & nunc in casu particulari constet, fraudem non intervenisse; sic matrimonium clandestinum, Professio ante 16um annum edita, contractus pupilli sine tutore

tutore initi &c, sunt & manent invalida. Quan-
do antem Lex suudetur in præsumptione peri-
culi ejusmodi communis, variant AA. nec regula
satis certa datur.

*Q. 14. Lex fundata in fictione juris an obliget
in conscientia?* R. Aff. Ratio, quia fundatur in
naturali æquitate, ob quam aliquid disponitur in
causa ficto, quod observaretur in vero. Sic Ca-
nonicus v. g. causâ infirmitatis absens per fictio-
nem juris præsens censetut in ordine ad percipi-
endos fructus beneficii, idque ob æquitatem na-
turalem, ne Clericus infirmus destituatur vitæ
necessariis, & ne affictio addatur affictio, aut alii
à statu Clericali suscipiendo deterreantur. c. 1.
& seq. de Cleric. ægrot.

*Q. 15. Quinam obligentur Legibus Ecclesiasti-
cis?* R. 1. Ecclesiasticis universalibus omnes ba-
ptizati adulti, rationis compotes, cuiuscunq[ue]
fuerint conditionis. c. 1. de Confit. c. 4. de
major. & obed. c. 13, de Judic. Sequitur hinc,
quod & Acatholici per se loquendo omnibus Le-
gibus Ecclesiasticis teneantur, quia dum ingressi
sunt Ecclesiam per baptismum, Christo ejusque
Vicario sunt subjecti; secus tamen est de infide-
libus, Judæis, Saracenis, Mahometanis; &c.
quia in hos utpote nunquam subjectos deficit
jurisdictio.

R. 2. Legibus Episcoporum seu Synodalibus
tenentur omnes, qui ibi domicilium, vel quasi
habent. Ratio, quia Episcopus est generalis pa-
stor respectu suæ diœcesis. Exemptos tamen

Re-

Regulares non stringunt Leges Episcoporum, nisi in casibus à Jure expressis. Ratio, quia exempti censentur esse extra territorium. Arg. c. 1. *de privileg. in 6.*

R. 3. Legislator, adeoque S. Pontifex nec *vi coactiva*, nec *directive directè*, seu *vi legum suarum* obligatur LL. Ecclesiasticis; *non primum*, quia summa sedes à nemine judicatur. *can. 7. dist. 21.* nec à seipso quis propriè cogitur. *Non secundum*, quia nemo in se ipsum exercet propriè *jurisdictionem*; obligatur tamen Princeps ex quadam decentia & *vi juris naturalis* suis etiam Legibus materiam communem & Legislatori *æquè* ac subditis convenientem spectantibus, quæ tamen obligatio non statim est gravis, juxta *Leff. L. 2. c. 35. dubit. 5. &c.* et si materia gravis sit, quia ex deordinatione & perturbatione Reip. gravitas est desumenda, quæ per se loquendo hic non est.

R. 4. Pueri & puellæ post annum septimum ætatis completum regulariter obligantur Legibus humanis quoad culpam, non quoad pœnam. Ratio, quia tunc censentur habere usum rationis, ergo sicut Legi naturali obligatur, qui est rationis compos, sic & humanâ, nisi excipiatur, aut certum tempus obligationis, sicut in jejunio, determinetur: quod pœnam *ordinariam* saltem, non incurvant ante annos pubertatis, habetur c. 1. & 2. *de delict. puer.*

R. 5. Peregrini neque tenentur Legibus patriæ, à qua absunt; *quia extra territorium jus dicenti im-*

impunè non paretur. c. 2. de Constit. in 6. neque regulariter Legibus particularibus loci, in quo ad breve tempus morantur; quia peregrini non sunt subditi, nisi in casibus à jure expressis. arg. c. nam & ego 3. de V. S. & L. 18. §. proinde ff. de judic. eadem procedunt de vagis.

Q. 16. Quinam obligentur LL. civilibus, & præcipue quid de Clericis dicendum? R. I. Utì S. Pontifex, ita & Legislator Princeps non tenetur Legibus suis, nisi ex quadam decentia L. 23. ff. de Legat. 3.

R. 2. Licet juxta dicta supra h. t. Q. 7. R. 4. Clerici (idem est de Religiosis) non ligentur LL. civilibus, quibus sive directe, sive indirecte tantum immunitas Ecclesiastica læditur; iis tamen Legibus Civilibus vi directivâ tenentur, quæ generaliter feruntur civibus, abstrahendo à Clericis vel Laicis, ac disponunt de re temporali omnibus communi, ac ad eorum mutuam societatem & conformitatem pertinente. Ratio, quia id exigit communio membrorum & tranquillitas Reip. Leges ejusmodi sunt statuentes formam contractibus, taxam mercibus, valorem pecuniae. Oritur autem hæc obligatio vi juris naturalis & Canonum Leges has civiles recipientium & quoad Clericos approbantium,

Q. 17. An & quando metus excusat ab observatione Legis? R. I. Si exigit bonum commune & necessitas Reip. v. g. ut inserviatur pestiferis, habeantur vigiliae &c. non excusat etiam metus gravis & periculum mortis à transgressione Legis.

etiam

etiam humanæ tantum. Ratio, quia in tali casu
aliter consuli non potest bono communi.

R. 2. Nullius mali, etiam mortis, metus ex-
cusat à transgressione præcepti naturalis prohi-
bentis intrinsecè malum: sic eis te moriturum pro-
pterea scias, non licet mentiri, fornicari, occide-
re directè innocentem; vel etiam violare jeju-
nium, si id in contemptum Religionis peteretur.

R. 3. Si actiones solo jure positivo, divino vel
humano præceptæ vel prohibitæ speciales sunt,
v. g. communicatio cum excommunicato, audi-
tio, sacri, recitatio horarum, integritas confessio-
nis, regulariter excusat metus & jaætura gravis.
Nota regulariter, quia & tales leges obligant,
dum vel earum observantia hic & nunc est neces-
saria ad bonum publicum, vel cederet in contem-
ptum Religionis, potestatis clavium &c.

R. 4. Si vel præcipiuntur vel prohibentur à
Lege divina aut humana pertinentia ad bonum
commune vel necessitatem Reip. vel spectantia
ad communem ritum Sacramentorum, quicun-
que demum metus incutiat, à transgressione
non excusat; sic quocunque metu proposito
teneor consecrare sub utraque specie, in pane
azymo in Ecclesia latina, in vestibus sacrís;
quia bonum commune cuilibet speciali est præ-
ferendum.

Q. 18. Quæ & qualis ignorantia excusat à Le-
gis observatione? R. 1. Ignorantia invincibilis Legis
ignorantem in foro interno excusat à culpa &
pcena: ideo à culpa, quia ignorantia tollit volun-
tarium,

tarium, & præcepto, quod nescio, parere non possunt: à pœnâ; quia cessante culpâ pœna pariter cessare debet, juxta *Reg. jur. 23. in 6.*

R. 2. Qui legem quidem scivit, pœnam tamen adjectam nescivit, eam non incurrit, si sit *medicinalis*, v. g. excommunicatio, vel alia censura; quia ad hanc incurrendam requiritur contumacia, & virtualis saltem contemptus: secus, si sit *vindictiva*.

R. 3. Si lex sit verè pœnalis, & pœnam intendat principaliter in eum finem; ut puniatur delictum, & homines intuitu hujus pœnae absterrentur à delictis hujusmodi perpetrandis, probabiliter non incurritur pœna, quæ ignoratur annexa esse delicto, contra legem humanam commisso. Ratio, quia aliás delictum inæquale, nimirum scientis legem & pœnam, & scientis legem tantum æqualiter puniretur, quod non. Vide Sanch. *Libr. 3. dist. 19. n. 9. & 11.*

Q. 19. Quid circa interpretationem Legum notandum? R. 1. Interpretatio legis est ejus declaratio, quæ declaratur, legem ad hunc vel illum casum esse extensam, vel non extensam. *Authentica* est, quæ fit per aliam legem ad declarandam priorem latam, vel ab ipso Legislatore, vel ab ejus successore. *Usualis*, quæ per usum & consuetudinem est introducta. *Doctrinalis*, quæ fit arte & peritiâ Interpretum & DD. & subdividitur in *declarativam*, *extensivam* purè vel *comprehensivam* tantum, ac in *restrictivam*, quæ est cum interpretamur aliquem casum particularem pro-

Liber I.

C

pter.

pter suas circumstantias in lege universaliter lata non comprehendendi, & hæc dicitur *Epykia*.

Resp. 2. Per interpretationem lex extendi debet ad casus similes (modò latè & aliquo modo significantur per verba legis) si in iis reperiatur eadem ratio, sive identitas rationis, ita ex *L. 9. §. 2. ff. de edendo. & L. 32. ff. ad L. Aquiliam* habet deducētum axioma, ubi eadem est ratio, eadem est legis dispositio. Patet etiam ex *Nov. 115.* ubi quod committens filius incestum cum Noverca exhæredari possit, dicitur: quæ Lex ob rationem datam extenditur ad filium cum matre incestum committentem. Assertio regulariter non procedit in exorbitantibus & odiosis, nisi detur inter personas correlatio, vel talis connexio, ut unum in alterâ contineatur tanquam pars in toto, vel aliàs sequeretur absurdum.

Resp. 3. Judices in judicando possunt ac debent legem extendere ad casus similes, ubi reputur etiam tantum paritas rationis. *L. 10. 12. & 13. ff. de LL.* ubi ratio datur, quia non possunt omnes casus singillatim in legibus exprimi.

Resp. 4. Per Epykiam licetè restringitur lex, si 1. aliàs lex in casu particulari fieret iniqua; sic lex præcipiens reddi depositum, non vult, ut furioso gladius depositus reddatur. 2. Si lex in casu quodam particulari præciperet quid nimis arduum. Sic lex jejunii non obligat in casu gravis infirmitatis. 3. Si prudenter credi possit, non iusse Legislatorem in hoc vel illo casu obligare. *Proceditque hoc non tantum in Lege humana, sed*

8

& in aliquibus Legibus divinis & naturalibus. Exempla sunt *Jud. 11.* & *Matth. 12.* Non tamen procedit in Legibus *irritantibus*: ita dicitur, matrimonium clandestinum nullum esse ob quamcunque etiam urgentem causam præsentia Parochi & testium defuerit. Ratio, quia leges irritantes non attendunt ad casus particulares, sed ad rationem tantum communem. Deinde nulla res potest subsistere sine forma substantiali, ergo in nullo casu absque dispensatione potest irritatio cessare, quæ oritur ex defectu talis formæ.

Q. 20. Quot modis Lex cesseret? *Resp. I.* In genere: tribus, cessatione finis, abrogatione, dispensatione.

Resp. 2. In specie: cessat Lex cessante fine Legis *intrinseco* & *adæquato*. Ratio, quia ita cessat essentiale constitutivum Legis, ergo & ipsa Lex.

Resp. 3. Abrogatione (quæ est totalis cessatione & sublatio Legis, cum derogatio sit particularis Legis imminutio) cessat Lex; si vel contraria priori Legi introducatur consuetudo; vel Legem latam revocet Legislator, ejus Successor, aut Superior: Inferior non potest, nisi forte ex privilegio vel præscripta consuetudine, abrogare Legem Superioris. *c. 7. & c. 16. de majorit. & obed.* Potest tamen Legem propriam vel statutum à Superiore confirmatum confirmatione simplici & concernens favorem non publicum, sed proprium abrogare. Ratio, quia non debet judicari, velle superiorem beneficium invito obtrudere, & ad favorum recipiendum obligare nolentem.

C 2.

Resp.

Resp. 4. Dispensatione (quæ definitur esse relaxatio alicujus juris, seu exemptio alicujus ab obligatione) cessat Lex, dum ii, qui possunt, in casu aliquo particulari relaxant Legem, v. g. Legislator ipse, Successor, Superior, & cui vel tacitè vel expressè potestate dispensandi delegavit. Hinc I. S. Pontifex potest dispensare in omni legge *Ecclesiastica* utpote Superior. 2. Episcopi extra casus expressè vel tacitè ipsis permisso in Lege Ecclesiæ universalis dispensare non possunt. c. 16. de major & obed. & Clemen. ne Romani. 2. de elect. 3. Circa quos exercetur dispensatio, debent esse subditæ, potest tamen habens facultatem dispensandi secum ipso dispensare. Ratio, quia dispensatio est aetas jurisdictionis voluntariæ, quæ distinctionem personarum non requirit. 4. Absque justâ causâ validè dispensat Legislator; quia ex voluntate ejus integrè Lex pendet; non tamen licet. Trid. sess. 25. c. 18. Ratio, quia talis Legislator imprudenter abutitur sua potestate; committit aliquo modo crimen acceptationis personarum; ansam præbet querelis aliorum, vel etiam contemptui Legum, quæ omnia sunt contra rationem. Ergo.

TITULUS III.

De Rescriptis.

Q. I. Quid sit rescriptum & quotuplex? *Resp.* ad I. Rescriptum generice sumptum est repon-